

02 DEC 1999

Abdullah-Analisis

SEMUA BADAN PERHUBUNGAN UMNO PERLU BUAT ANALISIS PILIHAN RAYA

JOHOR BAHRU, 2 Dis (Bernama) -- Timbalan Perdana Menteri Datuk Seri Abdullah Ahmad Badawi berkata semua badan perhubungan Umno perlu membuat analisis masing-masing berhubung pencapaian mereka pada pilihan raya umum Isnin lepas.

"Ini amat penting. Bagi yang menang pun seperti Johor, saya fikir perlu juga membuat post-mortem," katanya ketika berucap pada majlis tahlil dan kesyukuran anjuran Umno Johor di kediaman rasmi Menteri Besar di Saujana di sini, malam ini.

Abdullah, yang juga Naib Presiden Umno, berkata dengan Umno Johor membuat analisis itu, sekurang-kurangnya badan-badan perhubungan lain dapat mengetahui bagaimana Johor masih boleh mempertahankan kedudukannya yang kuat.

"Dengan itu, kita akan dapat juga faedah daripada analisis yang akan dibuat oleh BN Johor mengenai kemenangan yang diperolehi. Apa yang lebih dan ada pada Johor hingga boleh memberi kemenangan yang begitu besar. Di mana kekuatannya, kita perlu memahami juga," kata beliau.

Di samping itu, katanya, Umno dan BN Johor juga akan mendapat faedah daripada analisis-analisis negeri lain yang menghadapi kekalahan teruk seperti di Terengganu.

Pada pilihan raya umum ke-10, Barisan Nasional (BN) mengulangi kejayaannya pada tahun 1995 dengan menyapu bersih kesemua 20 kerusi parlimen dan 40 kerusi Dewan Undangan Negeri (DUN) di Johor.

Abdullah, yang menjalankan tugas-tugas Timbalan Presiden Umno, berkata Perdana Menteri Datuk Seri Dr Mahathir Mohamad telahpun mengarahkan supaya satu post-mortem yang komprehensif diadakan mengenai pencapaian BN pada pilihan raya umum lepas.

Analisis mendalam itu ialah mengenai kemenangan dan kekalahan BN di kerusi-kerusi tertentu, katanya.

"Saya setuju dengan arahan Perdana Menteri dengan harapan hasil daripada post-mortem itu, kita boleh membuat perubahan yang diperlukan dan juga mungkin mengambil langkah-langkah baru untuk memperkukuhkan lagi parti," kata beliau.

Pada pilihan raya umum Isnin lepas, BN memenangi 148 kerusi parlimen manakala PAS 27, DAP 10, Parti Keadilan Nasional lima dan Parti Bersatu Sabah (PBS) tiga.

Abdullah berkata BN telah berusaha bersungguh-sungguh untuk merebut kembali pemerintahan Kelantan tetapi tidak berjaya. "Mengapa, di mana kurang dan di mana tidak betul."

"Sama ada kita menang atau kalah, kita perlu jadikannya sebagai pengajaran. Kemenangan memang kemenangan yang bererti, tetapi biarlah kemenangan yang bererti itu juga memberi pengajaran kepada kita untuk memperkukuhkan lagi kedudukan kita pada masa depan yang lebih mencabar, dalam situasi yang baru," katanya.

Menurutnya, generasi baru akan muncul dan lebih aktif dalam pergerakan politik di tanah air dan inilah kumpulan yang akan dihadapi.

Mereka akan mempunyai aspirasi baru dan apa yang dikehendaki oleh mereka tidak sama dengan apa yang dikehendaki oleh generasi sebelumnya, kata beliau.

Abdullah berkata walau apapun, yang pentingnya pada abad akan datang, ialah Umno mesti menjadi parti politik yang terus relevan.

Yang hadir sama ialah Menteri Besar Datuk Abdul Ghani Othman, Menteri

Luar Datuk Seri Syed Hamid Albar dan Menteri Belia dan Sukan Tan Sri Muhyiddin Yassin.

-- BERNAMA

MKO zb